

唐文治 著

茹經先生自訂年譜

附著年表

茹經先生自訂年譜

附著作年表

無錫國學專修學校學生會校印

民國二十四年三月三十一日出版

茹經先生自訂年譜

全一冊 實價大洋二角

著 者 太 倉 唐 文 治

發 行 者 無 錫 國 學 專 修 學 校

無 錫 城 內 西 溪 唐 宅

印 刷 者 無 錫 民 生 印 書 館



年譜題辭

余弱冠時讀陸稼書湯潛庵張楊園暨吾鄉陸陳諸先生年譜心嚮往之復讀朱子年譜更大好之遂有必爲聖賢之志中年讀羅羅山胡潤芝曾滌笙左季高諸先生年譜志氣發揚更慨然以建功立業爲事然後歎奮乎百世之上百世之下感動興起所以立德立功者必以前賢年譜爲先路之導迺我生不辰運會杌隉立朝之時欲匡君德紓國憂迄無所成退而講學欲正人心維世道亦靡所裨每誦杜工部詩匡衡抗疏功名薄劉向傳經心事違之句輒爲慨然年譜云乎哉惟是師友之淵源學問之次第事變之閱歷著述之積累有不能已於懷者隨筆記錄彙爲一編甲戌歲七十初度同學索觀者甚衆友人侯官陳石遺同年益陽陳君天倪門人陳生柱尊等亦屢以爲言爰屬北流馮生振心校正付印振心復增入著作年表可感也嗟夫王風之詩曰行邁靡靡中心如醉小雅之詩曰明發不寐有懷二人追維往昔內疚孔多矣年譜云乎哉蔚芝唐文治自題

茹經年譜題辭

世系

周初封唐叔於晉系出姬姓郡名晉陽吾家遷婁始祖良鼎公譜載明末由金陵遷婁公弟
鼎臣遷崇明將宗譜攜去考其時當在明萬歷天啓之間良鼎公子鳳儀公配楊氏生文正
公妣王氏文璧公妣楊氏禮記曰別子爲祖繼別爲宗茲謹述繼別本支文璧公生子天棟
號宏任公始有遺傳手跡妣顧氏宏任公生子承燾號南軒公妣施氏生子景星號墨池公
嘉慶元年入州學第二名是爲吾宗入學籍之始妣徐氏墨池公嗣子森階號堯堯公 欽
賞八品頂戴候選按察使司知事 誥贈光祿大夫妣胡氏 誥贈一品夫人籓室張氏
誥贈一品夫人堯堯公嗣子學韓號翼亭公 誥贈榮祿大夫妣張氏繼妣王氏俱 誥贈
一品夫人翼亭公子受祺號若欽公咸豐九年入州學第四名補廩膳生乙丑 恩貢候選
復設教諭己未重遊泮水 誥封榮祿大夫妣胡氏 誥封一品夫人若欽公定子孫名以
文慶孝德爲世家祥八字爲次八世後再定子文治號蔚芝光緒六年入州學八年中式舉
人十八年中式進士官戶部主事改官外務部主事二十九年洊升外務部員外郎外務部

郎中改官商部右丞洊升左丞三十二年改商部爲農工商部升左侍郎署理尙書 誥封
光祿大夫配郁氏 誥贈一品夫人繼配黃氏 誥封一品夫人子慶詒美國哥倫比亞大
學外交科碩士配俞氏美國哥倫比亞大學教育科學士次子慶平殤三子慶增美國哈佛
大學經濟科碩士配周氏四子慶永美國哥倫比亞大學經濟科碩士聘錢氏未歸殤配陸
氏慶詒子孝宣慶永子孝威是爲第十二世孫也文治謹述

茹經先生著作年表

門人北流馮振謹編

例言

一所編先生著作以年譜所及各專書篇章與文集奏疏所載者爲限凡先生置諸外集暫不欲布之文概不列入

一凡專書中篇章有兼載文集中者亦並列之但見年譜不載文集者則不再列

一文集所載篇章其著作年歲有與年譜出入者概以年譜爲準

一凡專書非一年所成者以成書之年爲著作年歲

庚午六歲

是年受業於外叔祖胡嘯山先生之門先生名汝誠邑諸生時設帳楊氏衡宇相對因往受業先識字後讀孝經夜歸吾母恆自課之極嚴

辛未七歲

讀論語是時家貧約吾母甚健縫紉予衣補綴破裂或結數處同學咸姍笑之余語之曰余君子固窮若輩則小人窮斯濫矣同學咸訝之是二語蓋習聞外大父以之訓人者也夜課恆隨月讀書目力已受傷矣

壬申八歲

是年讀孟子

某節日赴汪家二姑母處午飯同座王君穀初名恩壽詢余志余曰吾願爲伊尹王君大奇之大父聞之甚喜

癸酉九歲

是年余家遷居飛雲橋東秦氏市屋受業於姨丈姚某翹先生之門先生名葆光邑諸生

爲芷軒太夫子之長君卽胡嘯山先生之壻也余時讀詩經同學陸君庚星名咸清聰慧絕倫已能詩余與之交後以其狂稍遠之

甲戌十歲

是年讀尙書吾父館於蘇州泖涇鎮李提督靄堂家課其子名景淮字漢秋讀

乙亥十一歲

去年 穆宗升遐今 上卽位本年改元光緒元年

是年隨吾父讀書於李宅夏余家遷居南牌樓趙氏宅余時讀周易

丙子十二歲

春在家讀書夏隨吾父赴上海參觀製造局受業於外大父古愚胡公之門公名汝直邑諸生時設帳廣東鄭氏余時讀禮記始學作制義及試帖詩 門人馮振謹案先生有

外祖古愚胡公家傳載茹經堂文集卷五第二十四頁又有外祖古愚胡公手蹟謹志載

同卷第三十九頁

丁丑十三歲

是年受業於姨丈錢會甫先生之門先生名宮極邑諸生爲祇文太夫子第四子余時讀左傳

戊寅十四歲

是年隨吾父讀書蘇州方氏主人益齋安徽桐城人其尊人傳書曾任太倉州牧吾父課益齋長子名懷仁字伯元讀余時讀五經畢業

夏王紫翔先生來館訪吾父暢談先生名祖畚癸酉科鄉試第二人吾父之執友也見余文亟賞之謂必成大器且謂宜讀古大家文以擴充其才氣先生去後吾父訓之曰汝尙幼稚稍長當執贄王先生門下也 振謹案先生有王文貞公文集跋載茹經堂文集

二編卷五第五十六頁王文貞先生學案鎮洋王紫翔先生文評手蹟跋王紫翔先生書函手蹟跋俱編入茹經堂文集三編尙未刊

秋始應童子試不售試時得交畢君枕梅名光祖

冬大父捐館舍追念平日愛我教我之恩哀痛之極尙能擗踊盡禮 振謹案先生有

王考府君事略載茹經堂文集卷五第一頁

己卯十五歲

去冬外大父胡公棄養其居停粵東鄭氏延請吾父赴上海教讀卽前余讀書處也同學昆仲二人長名學書字讓卿次名學源字靜卿時家境愈困余益發憤讀書恆至夜分冬應州試首場列七十四名初覆十九名再覆十三名三覆十一名州尊爲吳廣龔先生名承潞浙江名進士也

庚辰十六歲

春學院夏公子松歲試取入州學第六名公名同善浙江仁和人題爲一人定國堯次題文王之民無凍餒之老者詩題賦得惠風和暢得和字同入學者姊丈許君弼承名沐鑠友人張君海民名培埕 振謹案先生有夏文敬公年譜並遺詩後序載茹經堂文集二編卷五第十九頁

是年仍在鄭氏館中讀公羊穀梁傳及史記始學作古文

辛巳十七歲

春因姨丈黃公浚之介紹受業於紫翔王先生之門間三四日前往聽講先生教誨倍至

告之曰文章一道人品學問皆在其中故凡文之博大昌明者必其人之光明磊落者也文之精深堅卓者必其人之忠厚篤實者也至尖新險巧則人必刻薄圓熟軟美則人必鄙陋汝學作文先從立品始不患不爲天下第一等人亦不患不爲天下第一等文並教余先讀汪武曹孟子大全陸清獻三魚堂集並唐宋文醇熊鍾陵制義等余日夜淬勵於性理文學初知門徑矣

振謹案先生有外舅黃浚之先生家傳載茹經堂文集卷五第二十九頁又有外舅黃浚之先生誄文載茹經堂文集二編卷九第一頁

秋學院黃漱蘭先生科試余列一等十五名先生名體芳浙江瑞安人中興時直臣也題爲其所厚者薄而其所薄者厚未之有也策問太倉形勝詩題賦得一簾秋雨夢吳淞得吳字

冬吾父爲鎮海衛漕糧事因人受過姨丈黃公浚之銳身而出爲排難解紛並爲規畫一切全家感之

壬午十八歲

春正月郁夫人來歸夫人爲吾邑新塘市人外舅名振鏞字銘軒外姑楊氏內兄名朝桂

字擷芳邑諸生

振謹案先生有外舅郁銘軒先生家傳載茹經堂文集卷五第二十

七頁

是年隨吾父讀書本邑城北陸氏主人爲陸君少江名錦采與吾父同門課其子長智賢次智海三智廣四智淵時余學頗精進書毋不敬毋自欺六字於座右行路不斜視務收束身心分日讀朱子小學近思錄性理精義學部通辨程氏讀書分年日程等兼鈔王學質疑明辨錄細讀之覺醞醞有味讀孟子乃更有心得爰摘錄大全諸先儒說並錄王師筆記作讀孟劄記理學乃日進同學有王君晉蕃名康壽王師之從弟也李君虎臣名炳陸君禮南名朝琮相與考德問業深得切磋之益

振謹案先生有王晉蕃先生生傳已編入茹經堂文集三編尙未刊

吾邑城內向無天主耶穌教堂夏四月忽有耶穌牧師吳虹玉自上海來傳教購鎮民橋宋姓房屋行將遷入矣王師聞之謂是不可以啓外侮偕邑紳並諸同學數十人往謁州縣尊阻止之余亦隨往縣尊任石芝先生坐大堂判決資送吳虹玉出境償其費撥公款購買宋姓屋改爲鄉先賢陸尊道桴亭陳安道確菴江孝友藥園盛貞介寒溪四先生祠

六月某日修葺竣工余隨吾父吾師恭送粟主入祠邑長老暨同志來者甚多

將赴省試王師示以金陵官書局單囑購讀數種余苦無資內子聞之立出奩具內銀錠數枚交余自赴當舖質之得八金余喜甚遂購性理書數種今家藏二程遺書朱子全書拙修集皆郁夫人奩中物所購也

七月隨吾父赴金陵省試試前余日遊書肆中熱患暑病吾父爲檢理考具入場時人極擁擠汗出而愈題爲子曰小子何莫學夫詩兩章次題尊賢之等禮所生也三題命也有性焉君子不謂命也詩題賦得袖中吳郡新詩本得新字榜發余中式第二十名房師爲安徽知縣林燮軒先生名調陽福建長樂人座師爲侍郎許公星叔名庚身浙江仁和人翰林院編修譚公叔裕名宗浚廣東南海人報到之日吾父吾師均甚喜輿論謂先人焚券之報蓋先曾祖堯堯公當道光年間大水時曾將貧戶借貸之券概付焚如不令償還人以爲陰德也同舉者金君蓬生名簾硯香先生之孫也

振謹案先生有譚叔裕先生墓表載茹經堂文集卷六第三十三頁

冬隨吾父赴揚州籌明歲計偕資見表叔毛平甫名華時爲兩淮鹽知事贈余初印仿宋

本說文解字一部

癸未十九歲

春隨王師赴禮部試寓宣武門外球芝巷太倉會館榜發王師中式入詞林授庶吉士余下第歸

五月姊氏文珠卒姊天性仁孝通翰墨勤於操作乃竟不壽吾父吾母哭之慟吾父輓聯云病由熱中貽誤在醫藥余方冀鬼求食神有靈或者隱與挽回此後依依仍繞膝症已積久忘情輕死生汝可知父漸衰母多病何故決焉舍去相看默默竟無言余與內子含悲勸慰而吾母肝鬱頭暈之病遂日增矣
振謹案先生有歸高陽姊氏墓誌銘載茹

經堂文集卷五第十五頁

秋友人張君海民卒張君亦從王師遊天資近道喜閱性理書步趨先儒不踰禮法嘗語余曰聖賢之學在躬行先儒有言懈怠一生卽是自暴自棄此言最有味余爲悚然起敬焉文章書法亦極工以中暑病卒且無後余往弔之不覺涕泗之橫流也爲錄成遺稿一卷癸巳歲其族人小元出資刊之